

GENESISI

Kudala kwaNkulunkulu

1 Ekucaleni Nkulunkulu wadala
lizulu nemhlaba. ²Umhlaba

wawulihlane lelingenalutfo, bumnyama
babumbonye emanti nekujula kwavo;
Moya waNkulunkulu^a abehla enyuka
ahambahamba etikwemanti.

^{a)} **1:2:** Nome “*Moya waNkulunkulu*” nome “*umoya lowesabekako*” nome “*emandla aNkulunkulu*” nome
“*umoya lophuma kuNkulunkulu*”
1:1: Hla. 33:6; 90:2; 104:2; 136:5; Joh. 1:3; Khol. 1:16; Heb. 11:3 **1:2:** 2 Khor. 4:6

3 Nkulunkulu watsi: "Akube khona kukhanya," kwaba khona kukhanya. ⁴Nkulunkulu wabona kutsi kukhanya kuhle. Nkulunkulu wehlukanisa kukhanya nebumnyama. ⁵Nkulunkulu wakwetsa kukhanya watsi: "Yimini," bumnyama wabetsa watsi: "Busuku." Kwahlwa, kwasa: Kwaba lilanga lekucala.

6 Nkulunkulu watsi: "Akube khona umkhatsi emkhatsini wemanti, wehlukanise emanti nemanti." ⁷Nkulunkulu wenta umkhatsi, wehlukanisa emanti labengephansi kwemkhatsi nemanti labengetulu kwemkhatsi. Kwase kuba njalo. ⁸Nkulunkulu wawetsa lomkhatsi watsi: "Lizulu." Kwahlwa, kwasa: Kwaba lilanga lesibili.

9 Nkulunkulu watsi: "Emanti langephansi kwelizulu akabutsane ndzawonye, kubonakale umhlabo lowomile." Kwase kuba njalo. ¹⁰Lokomile Nkulunkulu wakwetsa libito watsi: "Ngumhlabo;" nemanti labutsene ndzawonye wawetsa libito watsi: "Lwandle." Nkulunkulu wabona kutsi loko kuhle. ¹¹Nkulunkulu watsi: "Umhlabo awuvete konkhe lokumilako: lokutsela tinhlavu, netihlahla tetitselo letitsela tinhlavu letiyinhlanyelo ngetinhlobo tato." Kwase kuba njalo. ¹²Umhlabo waveta konkhe lokumilako lokutsela tinhlavu, netihlahla tetitselo letitsela tinhlavu letiyinhlanyelo ngetinhlobo tato. Nkulunkulu wabona kutsi loko kuhle. ¹³Kwahlwa, kwasa: Kwaba lilanga lesitsatfu.

14 Nkulunkulu watsi: "Akube khona tibane emkhatsini wesibhakabbaka tehlukanise imini nebusuku; atibe tibonakaliso tetikhatsi, netemalanga, neteminyaka. ¹⁵Atibe tibane temkhatsi wesibhakabbaka tikhanyisele umhlabo." Kwase kuba njalo. ¹⁶Nkulunkulu wenta tibane letikhulu taba tibili: lesikhulu kutsi sibuse imini, lesincane kutsi sibuse busuku. Wenta netinkhanyeti futsi.

¹⁷Nkulunkulu watibeka emkhatsini wesibhakabbaka kutsi tikhanyisele umhlabo, ¹⁸tibuse imini nebusuku, tehlukanise kukhanya nebumnyama. Nkulunkulu wabona kutsi loko kuhle. ¹⁹Kwahlwa, kwasa: Kwaba lilanga lesine.

20 Nkulunkulu watsi: "Emanti akagcwale yonkhe inhlobo yetilwane letiphilako, kundize tinyoni etikwemhlabo emkhatsini wesibhakabbaka." ²¹Ngako-ke Nkulunkulu wadala tilwane letikhulu taselwandle nato tonkhe tinhlobo tilwane letiphilako letigcwele emantini ngetinhlobo tato, nato tonkhe tinhlobo tetinyoni letinetimpiko. Nkulunkulu wabona kutsi loko kuhle. ²²Nkulunkulu watibusisa watsi: "Talanani, nandze niggwalise tilwandle, netinyoni tandze nemhlabo wonkhe." ²³Kwahlwa, kwasa: Kwaba lilanga lesihlanu.

24 Nkulunkulu watsi: "Umhlabo awuvete tonkhe tinhlobo tetilwane letiphilako: tonkhe tinhlobo tetifuyo, netetilwane letihamba ngesisu, netilo tesiganga." Kwase kuba njalo. ²⁵Nkulunkulu wenta tonkhe tinhlobo: tetilo tesiganga, netetifuyo, netetilwane letihamba ngesisu. Nkulunkulu wabona kutsi loko kuhle.

26 Nkulunkulu wase utsi: "Asente bantfu, babe ngumfanekiso wetfu, basifute; babuse etikwetinhlanti taselwandle, nasetikwetinyoni tasemoyeni, nasetikwetifuyo, nasetikwemhlabo wonkhe, nasetikwato tonkhe tilwane letihamba ngesisu netilwanyakatana."

27 Ngako Nkulunkulu wadala umuntfu
waba ngumfanekiso wakhe;
wamdalwa waba ngumfanekiso
waNkulunkulu:
wabadala, lomdvuna nalomsikati.

28 Nkulunkulu wababusisa watsi:
"Talanani, nandze, niggwalise umhlabo,

1:6: Jer. 10:12; 51:15 1:7: Isa. 40:22; 42:5; 44:24 1:9: Hla. 33:7 1:14: Jer. 31:35
1:22: Gen. 8:17 1:26: Hla. 8:5; Heb. 2:6 1:27: Gen. 9:6; Ef. 4:24; Khol. 3:10

niwuncobe. Nibuse etikwetinhlanti taselwandle, nasetikwetinyoni tasemoyeni, nasetikwato tonkhe tilwane letihamba emhlabeni.”²⁹ Nkulunkulu watsi: “Ase nibuke la, ngininike tonkhe tibhidvo letisemhlabeni wonkhe letimilisa inhlanyelo, nato tonkhe tihlahla letinenhlaneyelo etitselweni tato, kutsi kube kudla kwenu.”³⁰ Kepha konkhe lokuphilako: tilwane temhlaba, nato tonkhe tinyoni tasemoyeni, netilwane letihamba ngesisu, ngikunika konkhe lokuluhlata kutsi kube kudla kwako.” Kwase kuba njalo.
³¹ Nkulunkulu wakubona konkhe labesakwentile, kutsi kuhle kakhulu. Kwahlwa, kwasa: Kwaba lilanga lesitfupha.

Lilanga lesikhombisa

2 Ngako-ke kwase kupheleliswe lizulu nemhlaba, nendalo yako konkhe.
² Ngelilanga lesikhombisa Nkulunkulu abesawucedzile wonkhe umsebenti wakhe labewenta; wase uyaphumula.
³ Ngako-ke Nkulunkulu walibusisa lilanga lesikhombisa, walingcwelisa; ngobe ngalo waphumula emsebentini wakhe wonkhe wekudala.

4 Ladalwa kanjalo-ke lizulu nemhlaba.

Insimi yase-Edeni

Ngesikhatsi Nkulunkulu Simakadze enta umhlaba nelizulu,⁵ kusete nakunye lokumilako emhlabeni, netibhidvo tisengakabikho, ngobe Nkulunkulu Simakadze abesengakayinisi imvula emhlabeni, kwakute umuntfu wekuwulima lomhlaba.⁶ Noko kwenyuka inkhungu, iphuma emhlabatsini, yanisela wonkhe umhlaba.

7 Nkulunkulu Simakadze wase ubumba umuntfu ngelutfuli lwemhlabatsi, waphefumulela umoya wekuphila emakhaleni akhe; umuntfu wase uba ngumuntfu lophilako.

8 Nkulunkulu Simakadze wahlanyela insimi yase-Edeni ngasemphumalanga; wambeka khona-ke lomuntfu labesamentile.⁹ Nkulunkulu Simakadze wamilisa emhlabatsini tonkhe tihlahla letibukerekako letimnandzi; ekhatsi nensimi wamilisa sihlahla sekuphila kanye nesihlahla sekwati lokuhle nalokubi.

10 Kwavela umfula lowageleta wanisimi yase-Edeni, udzabula ekhatsi nayo, bese wehlukana uba ngimifula lemine.¹¹ Libito lemfula wekucala yiPhishoni; ngulona logeleta utungelete lonkhe live laseHavila, lapho kunegolide khona.¹² Igolide yalelo live yinble kakhulu; kunenhlaka yebhedola kanye nelitje isholamu kulelo live.

¹³ Umfula wesibili yiGihoni; ngiwo logeleta utungelete lonkhe live laseKushe.¹⁴ Libito lemfula wesitsatfu yiThigrisi, logeletela ngasemphumalanga ye-Asiriya. Umfula wesine yiYufrathe.

15 Nkulunkulu Simakadze wamtsatsa umuntfu wambeka ensimini yase-Edeni kutsi ayilime, ayilindze.¹⁶ Nkulunkulu Simakadze wamyala umuntfu watsi kuye: “Ungadla ngekutsandza kwakho tonkhe titselo letilapha ensimini;¹⁷ kodvwa ungasidli sitselo sesihlahla sekwati lokulungile nalokungakalungi, ngobe mhlazana usidla uyakufa nekufa.”

Kudalwa kwalomsikati

18 Nkulunkulu Simakadze watsi: “Akukuhle kutsi umuntfu ahiale yedvwana. Ngitamentela umsiti lolungele yena.”¹⁹ Ngako-ke Nkulunkulu Simakadze wabumba ngemhlabatsi tonkhe tilwane tesiganga, netinyoni letindiza emoyeni, watiletsa kumuntfu kutsi abone kutsi utetsa njani. Lawo mabito latetsa wona tabitwa ngawo.²⁰ Ngako-ke umuntfu watetsa emabito tonkhe tifuyo, netinyoni letindiza emoyeni, nato tonkhe tilwane

1:29: Gen. 9:3 **1:30:** Isa. 11:6 **2:2:** Eks. 20:11; 31:17; Dut. 5:14; Heb. 4:4 **2:7:** 1 Khor. 15:45,47
2:18: Shu. 4:9

tesiganga. Kepha Adamu^b akamfolanga umsiti labelungele yena.²¹ Ngako-ke Nkulunkulu Simakadze wamehlisela umuntfu butfongo lobukhulu; walala. Nkulunkulu wase ukipha lolunye lwetimbambo takhe wagcwalisa sikhala ngenyama.²² Nkulunkulu Simakadze wambumba lomsikati ngelubhambo labelukhiphe kulomdvuna, wase umyisa endvodzeni.

23 Indvodza yatsi:

“Lona-ke sewulitsambo lematsambo ami,

nenyama yenyma yami.

Uyawubitwa ngekutsi:

‘yindvodzakati’,

ngobe utsetfwe endvodzeni.”

²⁴ Ngako-ke indvodza iyawushiya uyise nenina inamatsele kumfati wayo, bese baba nyamanye.

25 Babehamba ngcunu, bobabili, lendvodza nemkayo, bate emahloni.

Kuwela kwemuntfu esonweni

3 Inyoka yayinebucili kwendlula tonkhe tilwane tesiganga labetentile Nkulunkulu Simakadze. Yatsi kumfati: “Kodvwa ngempela Nkulunkulu ushito yini kutsi: ‘Ningadli nome ngusinye nje sitselo setihlahla letisensimini?’”

2 Umfati waphendvula inyoka watsi: “Singatidla titselo tetihlahla letisensimini,³ ngaphandle kwesitselo sesihlahla lesisekhatsi nensimi; Nkulunkulu utsite: ‘Ningasidli sitselo sesihlahla lesisekhatsi nensimi, ningasitsintsi nekusitsintsia, kuze ningafi.’”

4 Inyoka yatsi kumfati: “Ningeke nife. Kepha Nkulunkulu uyati kutsi mhlazana nisidla, emehlo enu ayawuvuleka, bese nifanana naNkulunkulu nikwati lokuhle nalokubi.”

6 Ngako-ke watsi umfati kube abone kutsi lesihlahla sasifanelwe kudliwa, nekutsi sasibukeka sisihle, nekutsi

lesihlahla sasifanele kumhlakaniphisa umuntfu, wakha kulesihlahla wadla. Wanika nendvodza yakhe, nayo yadla. Emehlo abo bobabili ase ayavuleka, batibona kutsi bangcunu; base batfunga emacembe emkhiwa, batentela kwekuvunula.

8 Ekupholeni kwelilanga beva Nkulunkulu Simakadze ahambahamba ensimini; bo-Adamu nemkakhe bambhacela Nkulunkulu Simakadze emkhatsini wetihlahla tensimi. ⁹ Kodvwa Nkulunkulu Simakadze wabita Adamu watsi: “Ukuphi?”

10 Waphendvula watsi: “Ngive livi lakho ensimini, ngase ngiyesaba, ngobe ngihamba ngcunu; ngabhaca.”

11 Nkulunkulu wambuta watsi: “Ngubani losakutjele kutsi uhamba ngcunu? Sewusidile yini lesitselo salesihlahla lengakuyala ngaso kutsi ungabosidla?”

12 Adamu waphendvula watsi: “Ngulomfati lowanginika yena kutsi ahlale nami, nguye lona longinike lesitselo, ngase ngiyasidla.”

13 Nkulunkulu Simakadze watsi kumfati: “Yini-ke lena lose uyentile?”

Umfati watsi: “Ngikhohliswe yinyoka, ngase ngiyadla.”

Nkulunkulu ukipha sigwebo

14 Nkulunkulu Simakadze watsi enyokeni:

“Njengobe sewente loku, sewucalekiswe ngetulu kwato tonkhe tilwane: tonkhe tifuyo, nato tonkhe tilwane tesiganga. Sewuyawuhamba ngesisu sakho, ngesikhatsi sonkhe sekuphila kwakho udle lutfuli lwemhlabatsi.

¹⁵ Ngitawubeka butsa emkhatsini wakho nemfati, nasemkhatsini wentalo yakho nentalo yemfati.

Yona iyawufihlita inhloko yakho,

b) 2:20: “Adamu” kusho “umuntfu”

2:22: 1 Khor. 11:8; 1 Thim. 2:13 2:24: Mat. 19:5; Mak. 10:7; Ef. 5:31 3:1: Joh. 8:44

3:6: 2 Khor. 11:3; 1 Thim. 2:14 3:15: Rom. 16:20; Heb. 2:14; 1 Joh. 3:8

wena uyawulumula sitsendze sayo.”

¹⁶ Watsi kumfati:

“Ngitakwanzisa buhlungu
ekukhulelwani kwakho,
bube bukhulu kakhu;
uyawutala bantfwana kabuhlungu.
Kufisa kwakho kuyawubasendvodzeni
yakho,
yona iyakukubusa.”

¹⁷ Ku-Adamu watsi:

“Njengobe ulalele livi lemfati wakho,
wasidla lesitselo salesihlahla
lengakuyala ngaso ngatsi: ‘Ungasidli,’
umhlaba sewucakisiswe nganca
yakho.

Sewuyakudla kuwo kamatima
onkhe emalanga ekuphila kwakho.

¹⁸ Uyawukuvetela emanyeva
nelukhula,
wena uyakudla lokumila esigangeni.

¹⁹ Uyawusebenta kamatima,
ukujulukele kudla kwakho,
udzimate ubuyebe emhlabatsini,
ngobe vele watsatfwa kuwo;
njengobe ulutfuli,
uyawubuyela elutfulini.”

20 Adamu wametsa umkakhe watsi
ngu-Eva,^c ngobe waba ngunina wabo
bonkhe labaphilako. ²¹Nkulunkulu
Simakadze wentela bo-Adamu
nemkakhe kwekwembatsa
kwetikhumba, wabembatsisa.

Bo-Adamu na-Eva bayacoshwa

22 Nkulunkulu Simakadze watsi:
“Ase nibuke, Adamu sewunjengatsi,
sewuyakwati lokuhle nalokubi. Angahle
akhe kulesihlahla sekuphila adle, bese
uphila kuze kube phakadze
naphakadze.” ²³Ngako-ke Nkulunkulu
Simakadze wamcosha ensimini
yase-Edeni, kutsi alime umhlabatsi
labetsatfwe kuwo. ²⁴Wamkhipha
lo-Adamu; kwase kutsi
.ngasemphumalanga nensimi

yase-Edeni wabeka emakherubhi kanye
nenkemba lenelilangabi
lephendvuphendvukako ilindze indlela
leya esihlahleni sekuphila.

BoKhayini na-Abela

THE BIBLE in Swati

First edition 1996

© BIBLE SOCIETY OF SOUTH AFRICA 1996

ISBN 0 7982 1147 4	ISBN 0 7978 0689 X
ISBN 0 7982 1148 2	ISBN 0 7978 0691 1
ISBN 0 7982 1149 0	ISBN 0 7978 0690 3

c) 3:20: “Eva” kusho “kuphila”

d) 4:8: Letinye tincwadzi tekucala tite lenkhulumo

3:16: Ef. 5:22 3:17: Rom. 8:20 3:19: Hla. 90:3; 104:29; Shu. 3:20; 12:7; Rom. 5:12

3:24: Jer. 46:10; Hez. 1:4; 10:1 4:4: Heb. 11:4 4:7: Rom. 6:12

4:8: Mat. 23:35; 1 Joh. 3:12; Juda 11 4:10: Heb. 12:24; Jobe 15:20